

6
/

GEORGII ERNESTI STAHLII,
MED. DOCT. AC PROF. PUBL. ORDIN.
PROPEMPTICON IN AUGURALE
DE
CASIBUS MEDICIS
PRACTICIS.

GEORGI ERNESTI STAHLII
PROFESSORIS IN AUSTRIA
DE
CASIBUS MEDICIS
PRACTICIS



Ntiqua illa assertio, imò sacra, *Nihil novum fieri sub sole*, quantumlibet aliena interpretatione velut in dubium adduci posse videri queat, certè tamen, si vel paulo laxius sumatur, aut, abstrahendo à purè *artificialibus* effectibus, de his potius, quæ *natura*, & mentis propensione simpliciore,

perpetrantur, tueretur omnino dignitatem suam, ut passim quidem *aliter* aliquid fieri, sed non *aliud*, rem exquisitiùs perpendentibus, satis dilucescat. Quamvis autem etiam res *artificiosas* ex aliqua parte bono jure excipiamus, minime tamen illæ quoque ita simpliciter eximendæ sunt ab hoc censu, quin passim satis clarè appareat, quod etiam *artificiosæ* res non omnes totæ quasi primò *prodire*, sed nudis *schematismis* variatis, denuò *redire*, agnosci possint potius, quàm verè simpliciter novæ emergere. In rerum certè *materialium* republica, quæ secundum magnam illam *σύστασιν*, mutuis concursibus, successibus, cooperationibus, velut in scenam prodeunt, valet hoc certissimè, quod nusquam sincerè *prodeant*, ut *novæ*, sed *redeant* solùm, ut *de novo*. Et licet harum aliquæ etiam revera *raro* obtingant, comparatis tamen inter se antiquis monumentis, satis passim dilucescat, quod etiam jam à priscis temporibus eadem facta sint, aut planè hæc ipsa fuerint, sed inventa solùm seriùs, aut animadversa, *videantur* hoc respectu *nova*. Ut à generali latissimo ambitu, ad arctiorem complexum nos recipiamus, sumemus nobis, tanquam

specimen aliquod, vulgò ita nominatos *Casus Medicos Practicos*. Usitatum valdè est Doctoribus, ut collegia etiam tota, Philiatris proponant, *Casuum* Medicorum; minime contemnendo studio atque scopo, nec ita quidem ullo modo injusta appellandi ratione: cum utique imperitis, aut nondum satis exercitatis, etiam illa *nova* videri necesse sit, quæ vel quotidie passim eveniunt: Pro quilibus eò melius excitandis & exercendis, omni modo longè aptissima est illa methodus, ut ipsis *Historiæ morborum*, ea ratione proponantur, ut tanquam in rem præsentem adducti, sine præjudicio interim tertii, nempe Patientis, moram non sine periculo laturi, considerent securius, speculentur, imo agnoscant, quid è circumstantiis eliciendum, quid primo, quid posteriore loco, attendendum, quis primarius, quis secundarius affectus sit. Interim, cum in his etiam rebus offensio obtingere possit, quam evitare non magis utile sit, quam necessarium, placet propterea de hac re aliquid proferre. Ante omnia videlicet servandam puto, jure meritoque discretionem illam, quid simplicis *historiæ* morborum nomine, & nihil coacta *enarratione*, dignius esse, & longe commodius ita tradi atque doceri possit: quid verò contrà, tanquam ex involuto quodam complexu eliciendum, proponere atque sistere, expedire possit: & quibus maximè res tales ita proponi commodissimè debeant. Hòc enim modò inservit demum, *exercendis ingeniis*, methodus *casus* proponendi, quando *historias* morborum directas atque simplices, ante omnia rectissimè cognitatas habent; ut ita inter varias concurrentes fortè *accidentales* circumstantias, tanquam enucleare & dijudicare discant, quid directè, quid per indirectum, quid *primariò*, quid *secundariò* & ut ex accidenti, fieri aut subesse agnoscendum sit: ut ita verum morbum dignoscere, & ad illum intentiones suas dirigere possint. Quando verò perversa methodo negotium geritur, ut *involuti* quasi, *complicati* præcipuè magis, quàm *comitati*, affectus, talibus sistantur, qui singulorum veram & exactam indolem nondum intelligunt; frustra etiam esse omnem spem boni usus, tanquam in propatulo esse arbitror. Deinde verò,
& tan-

& tanquam *secundo loco*, pessundat sæpenumero certe, usum *casuum* ita narrandorum, illud ingens præjudicium, quod Medicina hodierna nimis aliena sit à cognitione & prudentissima æstimatione *decursum & eventuum morborum*, prout illi, etiam sine omni positivo adjumento artis, ipsius *Naturæ* energia, ita in ordinem coguntur, ut illis superatis, œconomia corporis suæ integritati restituatur. Qualibus methodis, mediis, viis, eventibus, hæc omnia procedant? Quid vero etiam *ars* verè & sincerè hic possit, ab his naturæ methodis re vera diversum, *melius*, inquam, illis, & ante omnia *paratius*. Ubi nempe, *tertiò*, cum *casus* tales, communiter ut in ordine ad *Therapiam*, producantur; nisi benè discernatur, quid à *naturæ* potestate, quid ab *artis* præsiidiis, sperandum veniat, non potest unquam casus talis solidè resolvi, nisi morbus, non ut in casu præsentē sese offerat: sed ut in sua indole sese gerere jam certum esse debet, quò recte judicari, aut ad methodum medendi convenientem applicari, possit. Unde quidem, *quartò*, illud, quod *casibus* hujusmodi, si non simpliciter finguntur, sed è verà observatione memorantur, multum certe difficultatis injicit, est sæpenumero ipsa, alibi prægressa, alibi concurrens, *heteroclita tractatio artificialis*: Ubi deinde fieri non potest, quin veræ indoli morborum, ut *in se* existere deberent, varia præjudicia eveniant, ex insolitis phænomenis, per *inconditam tractationem* demum introductis: quæ sæpenumerò non magis dignotionis promptitudinem morari, quam ipsum etiam morbum, ejusque justum & legitimum obsequium ad justam quoque curationem, variè disponere possunt. Unde, si deinde tales *casus*, ad finem usque enarrentur, rerum recte *peritis*, veluti in sensus incurrat, quod non tam *morbi*, quam *inconditæ curationis*, ille *casus* habendus, pessimè certè paradigmatis loco, ad imitationem proferatur. Cæterum autem, *quintò*, hujusmodi *casus*, scriptis, directè & simpliciter *didacticis*, inferere, quæ aliqui pro usu tanquam particulari, *discendi* & sese *exercendi*, usurpare debeant, minimè justum est, & æquum. Interim, uti tales res etiam veluti semper denuò recoquere, certè odiosè supervacuum est, (loquor autem de publicis enar-

rationibus;) ita tantò magis ineptum certe est, hujusmodi res non tam è *media* potius *quotidiane praxi* arcessere & ad illam provocare: quam ex aliquot Authoribus similes historiolas conquirere, & prolixè, non allegare, sed transcribere. Sicut enim certè stupide stolidà esset ambitio, ex hujusmodi industria, prolixæ *eruditionis* existimationem aucupari: cum *Morroni* Directorium, *Lipenii* Bibliotheca, *A. N. C.* cum operosis passim suis *scholiis*, ne Tironibus quidem amplius tam parum nota sint, quin notissimum habeant, quod ad istorum ductum & indicia, nulla ulteriore *arte*, sed solo *otio*, & describendi *patientia*, opus sit: quibus subsidiis suppetentibus, etiam inertissimus de reliquo quilibet, hujusmodi res confarcinare possit. Quod autem ad *rariores* casus attinet, servandum certè etiam circa illos est prudentissimum judicium, ne vel contrario usui adhibeantur, nempe *ordinariis* morborum historiis stabiliendis: vel ex adverso, tanquam peculiari commemoratione digna reputentur, & tanquam *rariores*, æstimentur, talia, quæ potius ex *universali Experientia*, vere innumerabilium exemplorum quotidianorum, & vulgo quoque hominum satis notorum, manifestissimè, maxime verò *simplicissimè*, citari quàm maxime possent: & insuper quidem ita demum etiam quam maxime sincera exempla exhiberent, nempe solâ *perversa* forte tractatione deformatum morborum. Difficultas summa quæ impediât, ne hujusmodi casuum pertractationes, tali decente ratione perpetuò adornentur, imò potius vel nunquam prope modum ita uti conveniebat, instruantur, est utique primò omnium, portentosa illa quidlibet, circâ *historiam* æquè, atque mutuam *conspirationem morborum* opinandi, imò *fingendi*, licentia. Ex hac enim prognascitur utique versipellis illa, affectûs non solum alienius interpretandi, sed omnino, per falsam præconceptam opinionem, etiam simpliciter observandi, & exquisitè *enarrandi*, alienatio: Et hinc etiam, quarumlibet potius aliarum, quam *verarum* concurrentium causarum, animadversio. E quibus interim rebus, quantum damni non solum in morborum, sed etiam curationum, per *Fallaciam Non Cause ut Cause, historiam*, ingruant damna & offendicula, &

pas-

passim etiam falsæ opiniones, de *efficacia medicamentorum & methodorum*, quando propriæ *declinationi* morbi salutari talia adhibentur, & ita, (ut certe rectè deridet vulgus, *Das letzte bilfft*.) quod revertenti sanitati tanquam obviam missum est, illam restituisse creditur: hæc inquam facile est cordato æstimatori comprehendere. Unde quidem omnibus modis dignum esset, ut etiam hujus generis otiosæ, tanto magis autem vanæ, enarrationes, intra cancellos coërcerentur, & veritatis potius simplicitati, quam intricandis hujusmodi tricis, operam navaretur.

Differere hæc libuit per occasionem publicæ commendationis, quam à nobis postulat

DN. JUSTUS TOTTINUS,

Mitaviâ Curlandus

Natus hic in modo nominata Ducatus Celeberrimæ Metropoli, Patre Viro Nobilissimo atque Amplissimo **DN. JUSTO TOTTINO**, Senatore urbis spectatissimo: Matre virtutibus sexum suum ornantibus laudatissima, **ANNA MARGARETHA Windhorstin** honestissimi viri mercatorii ordinis filia. Ab his Parentibus optimis, non solum ad optimos mores ab ipsis cunis, post pietatis studium, sollicitè formatus, sed etiam optimis studiis dicatus atque destinatus a puero, privatorum Informatorum curæ præcipuè commendatus est: Adultior autem jam Scholæ Publicæ Celebri hujus urbis commissus. Tandem Anno 1700. Thorunium transmissus, florenti ibi adhuc Gymnasio adscriptus, philosophicas disciplinas coluit: Post biennium Regiomontum profectus, per anni forte spatium, Jurium studio animum applicuit. Proximo autem anno ad Illustrissimam hanc Regiam Fridericianam transmissus, mutato, cum Charissimorum tamen Parentum consensu, & Amicorum prudentum svasu, proposito, Medicam Artem comprehendere aggressus est. Eumque in finem Excellentissimi **DN. D. HOFFMANNI** quidem Collegium Experimentale Physicum Curiosum, & Commentationes atque Præmonstrationes

nes Materiæ Medicæ audivit: Mea vero Collegia Anatomico-Physiologicum, Pathologicum, Practicum repetitum, Chirurgicum, & Chymicum, omni cum industria percepit. Privatam etiam instructionem suscepit ab Experientissimo DN. D. GOHLIO, qui ipsi dictatas quondam a me Theses in omnes partes Medicæ Doctrinæ, vulgo Cursum Medicum vocant, diligenter explanavit. Præterea verò publicè etiam laudat benevolentiam atque facilitatem Experientissimorum Fratrum DNN. RICHTERORUM, Medicinæ Doctorum: qui non solum ad Collegium Practicum privatus olim habitum, sed etiam in Officinam Pharmaceuticam Orphanotrophæi instructissimam aditum, ipsi liberum concesserint: Quin etiam comitem ad visitandos ægros bene numerosos, passim adsciverint, unde clinicam morborum historiam comprehendendi, optimam occasionem obtinuerit. Tandem Anno 1707. in patriam reversus, & ibi quoque ad praxin, quantum occasio ferebat, attentus, annuo propemodum spatio, cum bonos, assistente DEO, successus experiretur, hortantibus propinquis ad proseguendam serio ipsam praxin converso animo, Honores etiam & Immunitates in Arte Summas adsequi animo proposuit. Reversus ita ad nos, Facultati nostræ desiderium hoc suum decenter aperuit, cumque nulla esset causa quamobrem ipsi deesse deberemus, aditum ad consveta examina merito impetravit. In quibus cum profectuum suorum laudabiles exhibuerit fructus, meritò ipsi ultimi etiam speciminis publici Inauguralis potestatem fecimus, hoc cum editurus sit Disputatione solenni, de DIÆTA, proximis Calendis Sept. ad hunc Actum Solennem SERENISSIMUM PRINCEPSEM SAXONIÆ Magnif. Pro-Rectorem, reliquosque Illustrissimos, Illustres, Maxime Reverendos, Excellentissimos, Generosissimos, Nobilissimos atque Doctissimos, Academiæ nostræ Proceres, Fautores, Cives, pro officii ratione, cum omni honore debito atque observantia invitamus. P. P. Dat. Halæ Magdeburg. die XXVI.

Augusti, MDCCIIIX.

(L. S.)